



Per far ir la roda da vent san ins trer a nez diversas tecnicas.



Producir in drink d'energia cun forza dil tgierp grazia alla maschina ch'il scolar Sandro Solèr ha construìu.

In potenzial d'energias sin plaz scola

La scola da Glion ha organisau emprem gi d'energia

■ Dapi jamnas s'occupan varga 170 affons da Glion culla tematica dall'energia. Il gi d'energia da vendergis vargau ei stau il punct culminant dil project. La manifestaziun cun varga 20 posts, ina fiera da plugs, in «rap» d'energia ed ina concorrenza ha empruau da sensibilisar affons e geniturs pil consum d'energia ed alternativas da spargnar. Igl onn vargau

ha igl Uffeci federal per energia distinguìu Glion sco marcau d'energia. Il «label» attribuìu agl emprem marcau spel Rein ei cumbinaus cun sforzs che lez fa en connex cun consumar, spargnar, tschercar e promover alternativas. Francar en scola e tiels affons la marca dil «marcau d'energia» ei stada ina dallas finamiras dalla cummissiun da Glion che ha l'incarica da sviluppar activitads

e surveglar ch'il «label» resti buca mo ina etichetta.

Suenter in temps bletsch ed jamnas cun aura variabla tut che ha gudiù igl emprem gi da stad da vendergis vargau. Als organisaturs dil gi d'energia dallas scolas da Glion ei quei stau pli che endreg. Per demonstrar l'energia solara zun optimal. Il meinascola *Silvio Dierich* cun sia equipa e la presidenta dil cussegl da scola *Angela Casanova* cun la sia han coordinau il gi d'acziun. Els han giu ina finamira, numnadamein quella d'intermediar als 174 scolars e scolarets la tematica «energia». Che quella ei zun vasta han ins saviu seperschuader tiels bunamein 20 posts da tut gener che las classas havevan semtgau. Durant in meins han scolars e scolarets zambergiau rodas da vent, barcas cun tracziun da gummis, instruments da recicladi e bia auter. Sil plaz da pausa ha ina gruppa presentau cussegls da spargnar ed in'otra in «rap» dall'energia. A moda didactica han ils affons empriu ch'ins sa metter en moviment maschinas cull'energia digl agen tgierp. Leutier han els secapescha construìu sez mieds da producir energia. Per exempel rodas da vent e pigns implonts solars. Tier in post haveva il scolar

Sandro Solèr zambergiau sez ina maschina da turschar, in ultra-legher «mixer» per far il drink d'energia.


Giugs, ina concorrenza ed ina cuorsa da punteras construìdas cun festa-coller e cordas ed auter material recicladi han dau anim al gi d'acziun. Tier in gi d'energia ha ina fiera da plugs buc astgau muncar. Sin quei eveniment havevan biars affons spitgau vess. Sin sis stans eis ei ve-

gniu vendiu e cumprau giugs e termagls. Igl ei dil reminent ina fuorma da recicladi che fa senn. La dismessa da rumians, il funcziunar d'ina batteria, il rimnar e dismetter sco era la capientscha per fatgs d'energia ha il project saviu intermediar buca mo als affons. Ei dat numnadamein buca megliers ambassadurs che affons cu ei ya per transmitter a carschi in messadi impurtont.

Augustin Beeli



Ils scolars dalla sisavla han stuschau el Glogn lur punteras construìdas cun material recicladi e mirau tgeinina che sbucca il pli spert el Rein.



Dus scolars dalla quarta davos lur stan tier la tematica dalla energia solara cun in quiz da jarvas.